

PARLIMEN MALAYSIA
PEMBERITAHU PERTANYAAN DEWAN RAKYAT

PERTANYAAN : Lisan

DARIPADA : YB. Dr. Ismail Bin Daut [Merbok]

TARIKH : 16 Mei 2016

SOALAN : YB. Dr. Ismail Bin Daut [Merbok] minta
MENTERI PERTANIAN DAN INDUSTRI
ASAS TANI menyatakan perkembangan
terkini kawasan Taman Kekal Pengeluaran
Makanan serta pelan jangka masa pendek
dan panjang Kementerian bagi
memastikan kejayaan program ini.

JAWAPAN

Tuan Yang Dipertua,

Taman Kekal Pengeluaran Makanan (TKPM) merupakan salah satu strategi di bawah Dasar Pembangunan Nasional (DPN 3) untuk metransformasikan sektor pertanian dengan menggalakkan pelaksanaan projek pertanian berskala besar, komersial dan berteknologi tinggi oleh usahawan termasuk sektor swasta. Pembangunan TKPM ini meliputi ketiga-tiga subsektor tanaman, ternakan dan perikanan yang melibatkan kerjasama antara Kerajaan Persekutuan, Kerajaan Negeri dan pengusaha. Kerajaan Negeri akan menyediakan tanah bersesuaian untuk dibangunkan dan mewartakannya bagi tujuan TKPM manakala Kerajaan Persekutuan pula akan menyediakan infrastruktur asas ladang.

Sehingga tahun 2015, sebanyak 75 TKPM tanaman, 99 TKPM ternakan dan 30 TKPM akuakultur telah diwujudkan. Bagi TKPM tanaman, seluas 10,216 hektar telah dibangunkan di seluruh negara yang melibatkan seramai 1,241 peserta. Jumlah pengeluaran TKPM tanaman pada tahun 2015 adalah sebanyak 81,086 tan metrik yang bernilai RM122.0 juta.

Bagi TKPM ternakan, seluas 8,015.3 hektar telah dibangunkan untuk aktiviti penternakan lembu pedaging, lembu tenusu, kerbau, kambing dan ayam melibatkan seramai 501 peserta. Jumlah pengeluaran TKPM ternakan pada tahun 2015 adalah sebanyak 16,519 ekor lembu dan kerbau; 3,285 ekor kambing; 5.1 juta ekor ayam dan 287,224 liter susu yang keseluruhannya bernilai RM83.06 juta. Bagi TKPM akuakultur, seluas 19,788 hektar telah dibangunkan yang melibatkan 902 peserta. Jumlah pengeluaran TKPM akuakultur pada tahun 2015 adalah sebanyak 46,732 ribu metrik tan yang bernilai RM266.51 juta.

Pada masa ini, Kementerian bersama-sama Jabatan merancang untuk memastikan semua ladang di TKPM memperolehi pensijilan MyGAP sebagai salah satu usaha memastikan projek berskala besar ini berperanan sebagai peneraju dalam melaksanakan amalan baik pertanian bagi menjamin kualiti produk dan memartabatkan sektor pertanian. Aktiviti pengembangan juga ditingkatkan dari semasa ke semasa bagi menjamin kualiti perladangan di TKPM ke arah mewujudkan kawasan pengeluaran makanan yang berdaya mampan.

Bagi pelan jangka panjang, Jabatan mengenalpasti beberapa pengusaha TKPM yang berpotensi untuk dibimbing untuk tujuan pengeluaran eksport bagi meningkatkan pendapatan pengusaha. Selain itu, pelan perancangan Jabatan juga meliputi langkah untuk membangunkan pengusaha-pengusaha pelapis pertanian di TKPM tersebut.